

Incumbensa Kappeler concernent la promoziun da purschiders da servetschs per interpresas en il Grischun

La discussiun publica davart il svilup da l'economia locala e davart la promoziun da l'economia en il Grischun sa concentrescha sin il turissem e sin la domiciliaziun da manaschis industrials. En Svizra è il sector da servetschs stà il sector economic il pli dinamic dals ultims decennis. El ha er stgaffi la part la pli gronda da plazzas da lavur supplementaras. Cuntrari a la Svizra èn ils servetschs orientads a l'export percenter creschids mo minimalmain en il Grischun.

Ils servetschs per interpresas sco branscha dal sector da servetschs giogan en il Grischun mo ina rolla marginala. Er la regenza grischuna giuditgescha la purschida da firmas da cussegliaziun grischunas sco minimala. En sia resposta a la dumonda Peyer concernent la pratica da la regenza en connex cun la surdada d'incaricas da studi e da chaussas sumegliantas remartga la regenza l'onn 2012 ch'il circol da firmas da cussegliaziun ch'èn qualifitgadas avunda per elavurar dumondas en la qualidad giavischada è relativamain pitschen e limità en il Grischun.

Facturs d'influenza ch'èn decisivs per in svilup cun success da servetschs per interpresas – er areguard activitads orientadas a l'export – èn per exempel:

- l'existenza d'ina scola auta cun absolventas ed absolvents d'in nivel aut;
- incumbensas da la confederaziun sco projects che han l'effect d'in far e che mainan ad avantatgs d'enconuschientscha;
- l'occupaziun da la rolla da pionier tras il chantun tar temas d'importanza naziunala;
- la promoziun sistematica tras il chantun;
- in aut grad d'outsourcing da prestaziuns, per las qualas il chantun è responsabel.

Quests facturs favurisants n'èn strusch avant maun en il Grischun.

La dimensiun da la promoziun dals servetschs per interpresas en il Grischun po variar da "far nagut" fin a l'integraziun explicita en la lescha per promover il svilup economic en il chantun Grischun. La promoziun la pli favuraivla però è quella d'incumbensar consequentamain interpresas grischunas cun servetschs per interpresas, natiralmain cun resguardar las directivas da la legislaziun da submissiun.

Per quest motiv vegn la regenza incumbensada d'elavurar e da realisar mesiras, cun las qualas i vegn garantì che servetschs per interpresas vegnan prestads en il futur pli savens da firmas grischunas. Il success da las mesiras sto alura vegnir cumprovà mintga onn.

Cuira, ils 12 da favrer 2013

Kappeler, Dudli, Caduff, Berther (Mustér), Caluori, Casty, Casutt Renatus, Casutt-Derungs Silvia, Cavegn, Dosch, Furrer-Cabalar, Geisseler, Jeker, Jenny, Joos, Koch (Tumein), Koch (Igis), Lorez-Meuli, Märchy-Caduff, Michael (Donat), Michael (Castasegna), Niederer, Niggli-Mathis (Grüsch), Parpan, Rosa, Sax, Tomaschett-Berther (Trun), Tscholl, Wieland, Buchli (Tenna), Degonda, Deplazes, Derungs, Epp, Müller (Susch)